

Transkription von Urkunde ZET 1490a

Ort, Datierung: Zerbst, 1490-06-28

Signatur: Stadtarchiv Zerbst, IA, 282

Inhalt: St. Sebastian Bruderschaft: Messe

Wy Orban werbeck Servaciüs reppyn Merten rademeker vnd Borg(er) / paszewalk Schuttmeistere der
loüeliken bruderschop sancti Sebastiani / jn der stadt Zcerwst Bekennen jn diesszem vnszern brieue vor
vns / vnsze Nakomelinge vnd vor alszwem(m)e die ohn syhen horen add(e)r leszen / Dath die
Dogentszam(m)e früwe Anna Jacob grufen szelig(e)r nagelaten / weddewen By vns vnnd vnszer
bruderschop mith hunderth olde / schogken gekoffth heth vnnd(e) wy vorkopen jn vnd mit craffth /
diesszes brieff(es) dar vor to bestellenn(e) ¹ By den Erhafftigen herrn / Besitter(e) des hus sancti
Sebastiani jn der kerken sancti Nicolai hir(e) / suluest alle Jar Jerliken der wekenn(e) des middewekens
eyne ghe/dechnissze vnd memorien mith dem ambachte der hilligen / Mysszenn allen den lieuen
sielen . die vth der gemelten fruwe(n) / geslechte syn vnd(e) werden vorscheyden , Vnnd szo auer dy
myssze / alsozo wu boüen berürt dorch vorhinderünge vnd ander be/swerünge vor gemelten heren nicht
erfolget vnd geholdenn(e) / werde Szo Beholden wy vor vns vnd(e) vnsze nakomelinge die macht / die
memorien By eynem(e) and(e)rn prister aüer den suluigen / altar sancti Sebastiani der vns dar to
bequem(m)e is tobestellende vnd(e) / holden to laten vp dat der gedachten fruwen gudewille vnnd /
v(or)dracht wü obgemelt nicht neddergeslagen Sund(e)r ane alle / hinderünge vnnd geüerde stede vnd
fheste solle geholden vnd(e) / vollenbracht werdenn , Des to orkünde vnd Bekentnis hebbenn / Wy
obgna(n)ten Schüttemeister vnsz(e)r Brüderschop Jngesigil an diesszen vnsz(e)rn brieff dhon
hengen(n) Vnd Gegeüen Nach / Cristi vnszers h(e)rn gebort vierteynhünd(er)t dar nach Jm(me)
Negenti/gisten Jar am(me) Mondag(he) Nach Joh(ann)is baptiste

¹ andere Lesart: *bestellen(de)*